

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

## **ZAKLJUČAK**

**o odbacivanju Prijave namjere koncentracije privrednog subjekta  
ASA ASSISTANCE d.o.o Sarajevo**

**Sarajevo,  
decembar 2020. godine**



Broj: UP-02-26-1-038-5/20  
Sarajevo: 22.12.2020. godine

Na osnovu člana 25. stav (1) tačka e) i člana 42. stav (2), u vezi sa sa članovima 14. i 16. Zakona o konkurenciji ("Službeni glasnik BiH", br. 48/05, 76/07 i 80/09), rješavajući po Prijavi namjere koncentracije privrednog subjekta ASA ASSISTANCE d.o.o Sarajevo, Trg međunarodnog prijateljstva br. 25, 71000 Sarajevo, zaprimljenoj dana 09.12.2020. godine, pod brojem: UP-02-26-1-038-1/20, Konkurencijsko vijeće Bosne i Hercegovine, na 77. (sedamdesetsedmoj) sjednici održanoj dana 22.12.2020. godine, donijelo je

### **ZAKLJUČAK**

1. Odbacuje se Prijava namjere koncentracije privrednog subjekta ASA ASSISTANCE d.o.o Sarajevo, Trg međunarodnog prijateljstva br. 25, 71000 Sarajevo, radi nepostojanja obaveze prijave koncentracije u smislu člana 14. stav (1) Zakona o konkurenciji.
2. Obavezuje se privredni subjekt ASA ASSISTANCE d.o.o Sarajevo, Trg međunarodnog prijateljstva br. 25, 71000 Sarajevo da uplati administrativnu taksu u ukupnom iznosu od 1.000,00 KM (hiljadu konvertibilnih maraka) u korist Budžeta institucija Bosne i Hercegovine.
3. Ovaj Zaključak biće objavljen u "Službenom glasniku Bosne i Hercegovine", službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 09.12.2020. godine, pod brojem: UP-02-26-1-038-1/20, zaprimilo Prijavu namjere koncentracije (u daljem tekstu: Prijava) privrednog subjekta ASA ASSISTANCE d.o.o Sarajevo, Trg međunarodnog prijateljstva br. 25, 71000 Sarajevo, ujedno i podnosioca prijave (u daljem tekstu: Podnosilac prijave ili ASA ASSISTANCE) i privrednog subjekta TESTING CENTAR d.o.o Mostar, Bišće polje bb, 88000 Mostar (u daljem tekstu: TESTING CENTAR ili Ciljno društvo).

Konkurencijsko vijeće je dana 16.12.2020. godine, pod brojem: UP-02-26-1-038-2/20, zaprimilo dopunu Prijave koju je Podnosilac prijave samonicijativno dostavio, a koja se odnosila na ažuriranje dokumentacije dostavljene uz Prijavu vezano za aktuelni izvod iz sudskog registra privrednog subjekta ASA ASSISTANCE.

Prijava se podnosi zbog namjere Podnosioca prijave da kupovinom 100% udjela Ciljnog društva stekne kontrolu nad istim.

Podnosilac prijave je, u skladu sa članom 16. stav (2) Zakona o konkurenciji ("Službeni glasnik BiH", br. 48/05, 76/07 i 80/09) (u daljem tekstu: Zakon), kao dokaz namjere provođenja koncentracije dostavio Pismom namjere koje su dana 07.12.2020. godine potpisali privredni subjekt ASA ASSISTANCE i

privredni subjekt DOTER - Društvo za održiv tehnološko-ekološki razvoj d.o.o., Visoka glavica 3, 88200 Široki Brijeg, kao vlasnik privrednog subjekta TESTING CENTAR.

Podnosilac prijave je, u smislu člana 30. stav (2) Zakona, naveo da učesnici koncentracije ne obavljaju djelatnost izvan teritorije Bosne i Hercegovine i da ne postoji obaveza podnošenja Prijave koncentracije bilo kojem drugom tijelu osim Konkurencijskom vijeću.

Konkurencijsko vijeće je dana 22.12.2020. godine, pod brojem: UP-02-26-1-038-3/20, izdalo Potvrdu o prijemu kompletne i uredne prijave, u smislu člana 30. stav (3) Zakona.

## **1. Učesnici koncentracije**

Učesnici koncentracije su privredni subjekt ASA ASSISTANCE i privredni subjekt TESTING CENTAR.

### **1.1. Privredni subjekt ASA ASSISTANCE (Podnosilac prijave)**

Privredni subjekt ASA ASSISTANCE, punim nazivom Društvo za trgovinu i usluge ASA ASSISTANCE d.o.o. Sarajevo, sa sjedištem na adresi Trg međunarodnog prijateljstva br. 25, 71000 Sarajevo, prema aktuelnom izvodu iz sudskog registra Općinskog suda u Sarajevu broj: 065-0-RegZ-20-009804 od 15.12.2020. godine, upisan je u sudski registar sa matičnim brojem upisa: 65-01-1633-09.

Osnovna djelatnost koju obavlja privredni subjekt ASA ASSISTANCE je pružanje usluga tehničkog pregleda motornih vozila, prema klasifikaciji djelatnosti navedenoj u sudskom registru "Održavanje i popravak motornih vozila" (šifra: 45.20).

Osnivač privrednog subjekta ASA ASSISTANCE sa 100% vlasničkog udjela je privredni subjekt Društvo za ekonomski, finansijski i pravni konsalting ASA HOLDING d.o.o Sarajevo, Bulevar Meše Selimovića br. 16, 71000 Sarajevo.

Privredni subjekt ASA ASSISTANCE, koji pripada ASA Grupaciji, nema povezanih društava u kojima ima 10% ili više udjela u osnovnom kapitalu ili 10% ili više prava glasa na tržištu Bosne i Hercegovine.

### **1.2. Privredni subjekt TESTING CENTAR (Ciljno društvo)**

Privredni subjekt TESTING CENTAR, punim nazivom TESTING CENTAR d.o.o., prema aktuelnom izvodu iz sudskog registra Općinskog suda u Mostaru od 21.10.2020. godine, upisan je u sudski registar sa matičnim brojem upisa: 58-01-0075-11.

Osnovna djelatnost koju obavlja privredni subjekt TESTING CENTAR je pružanje usluga tehničkog pregleda motornih vozila, prema klasifikaciji djelatnosti navedenoj u sudskom registru "Tehničko ispitivanje i analiza" (šifra: 71.20).

Osnivač privrednog subjekta TESTING CENTAR sa 100% vlasničkog udjela je privredni subjekt DOTER - Društvo za održiv tehnološko-ekološki razvoj d.o.o., Visoka glavica 3, 88200 Široki Brijeg, (u daljem tekstu: DOTER).

Povezana društva privrednog subjekta TESTING CENTAR, u kojima ima 10% ili više udjela u osnovnom kapitalu ili 10% ili više prava glasa na tržištu Bosne i Hercegovine, su:

- AUTO AC d.o.o. Široki Brijeg, sa 100% vlasničkog udjela (osnovna djelatnost "Tehničko ispitivanje i analiza", šifra 71.20),
- AC AUTO d.o.o. Goražde, sa 100% vlasničkog udjela (osnovna djelatnost "Tehničko ispitivanje i analiza", šifra 71.20),
- AP AUTO d.o.o. Mostar, sa 100% vlasničkog udjela (osnovna djelatnost "Tehničko ispitivanje i analiza", šifra 71.20),
- AC d.o.o. Široki Brijeg, sa 100% vlasničkog udjela (osnovna djelatnost "agenata i posrednika osiguranja", šifra: 66.22).

## **2. Pravni okvir ocjene koncentracije**

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona, Odluke o utvrđivanju relevantnog tržišta ("Službeni glasnik BiH", br. 18/06 i 34/10) i Odluke o načinu podnošenja prijave i kriterijumima za ocjenu koncentracija privrednih subjekata ("Službeni glasnik BiH", broj 34/10).

## **3. Pravni osnov i oblik koncentracije**

Pravni osnov podnošenja prijave namjeravane koncentracije, u skladu sa članom 16. stav 2. Zakona, je Pismo namjere koje su dana 07.12.2020. godine potpisali privredni subjekt ASA ASSISTANCE i privredni subjekt DOTER, kao jedini i isključivi vlasnik udjela u Ciljnom društvu.

Potpisivanjem Pisma namjere privredni subjekt ASA ASSISTANCE iskazuje čvrstu namjeru (..)\*\*<sup>1</sup>, u skladu sa posebnim Ugovorom o prenosu udijela koji će strane potpisati u pogledu transakcije.

Pravni oblik koncentracije je sticanje kontrole jednog privrednog subjekta nad drugim privrednim subjektom kupovinom većine udjela osnovnog kapitala, u smislu člana 12. stav (1) tačka b) pod 1) Zakona.

Prema navodima Podnosioca prijave sticanje kontrole privrednog subjekta ASA ASSISTANCE nad privrednim subjektom TESTING CENTAR, ostvariće se zaključivanjem ugovora o kupoprodaji, nakon što budu pribavljene sve prethodno potrebne saglasnosti od Konkurencijskog vijeća i/ili drugih nadležnih organa.

## **4. Relevantno tržište**

Relevantno tržište koncentracije, u smislu člana 3. Zakona, te članova 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojoj privredni subjekt djeluje u

---

<sup>1</sup> podaci predstavljaju poslovnu tajnu u smislu člana 38. Zakona o konkurenciji

prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuju od uslova tržišne konkurencije na susjednim geografskim tržištima.

Shodno navedenim odredbama, relevantno tržište predmete koncentracije određeno je prema osnovnoj djelatnosti i geografskom području na kojem učesnici u koncentraciji obavljaju djelatnost.

Prema navodima Podnosioca prijave, osnovna djelatnost kojom se bave oba učesnika u koncentraciji je pružanje usluga tehničkog pregleda motornih vozila, koju oni u najvećoj mjeri ostvaruju na teritoriji Federacije Bosne i Hercegovine.

Podnosilac prijave je u 2019. godini imao ukupno (..)\*\* stanica tehničkog pregleda, dok je Ciljno društvo imalo (..)\*\* stanica tehničkog pregleda u Federaciji Bosne i Hercegovine i (..)\*\* stanicu na teritoriji Republike Srpske.

Pored toga, Ciljno društvo ima i tri povezana društva (AUTO AC d.o.o. Široki Brijeg, AC AUTO d.o.o. Goražde i AP AUTO d.o.o. Mostar), koji imaju (..)\*\* stanicu tehničkog pregleda i sve su locirane na teritoriji Federacije Bosne i Hercegovine, ali iste tokom 2019. godine nisu bile aktivne, odnosno na istima nisu pružane usluge tehničkog pregleda.

Uzimajući u obzir osnovnu djelatnost koju obavljaju učesnici u koncentraciji, kao relevantno tržište proizvoda predmetne koncentracije određeno je tržište pružanja usluga tehničkog pregleda motornih vozila.

Uzimajući u obzir teritoriju na kojoj učesnici u koncentraciji obavljaju djelatnost, kao relevantno geografsko tržište predmetne koncentracije određena je teritorija Federacije Bosne i Hercegovine.

U skladu sa navedenim, relevantnim tržištem predmetne koncentracije smatra se tržište pružanja usluga tehničkog pregleda motornih vozila u Federaciji Bosne i Hercegovine.

## 5. Obaveza prijave koncentracije

Da bi se utvrdilo postojanje obaveze prijave namjeravane koncentracije, u skladu sa članom 14. stav (1) Zakona, analizirani su podaci iz Prijave koji se odnose na ukupan godišnji prihod učesnika koncentracije ostvaren u godini koja je prethodila koncentraciji (Tabela br.1), kao i podaci o tržišnim udjelima učesnika u koncentraciji na relevantnom tržištu u godini koja je prethodila koncentraciji (Tabela br.2).

Tabela br.1

<b>Ukupan prihod učesnika u koncentraciji ostvaren u 2019. godini izražen u KM</b>			
<b>Privredni subjekt</b>	<b>ASA Grupacija</b>	<b>ASA ASSISTANCE</b>	<b>TESTING CENTAR</b>
<b>BiH</b>	(..)**	(..)**	(..)**
<b>Svijet</b>	(..)**	(..)**	(..)**

Izvor: podaci iz Prijave

S obzirom da je Podnosilac prijave jedno od povezanih društva unutar ASA Grupacije, u Tabeli br.1 su pored ukupnog godišnjeg prihoda privrednih subjekata ASA ASSISTANCE i TESTING CENTAR navedeni i podaci o ukupnom godišnjem prihodu ASA Grupacije.

Prema podacima iz Tabele br.1, učesnici koncentracije privredni subjekti ASA ASSISTANCE i TESTING CENTAR u 2019. godini nisu ostvarili ukupan godišnji prihod koji podliježe obavezi prijave koncentracije u skladu sa članom 14. stav (1) Zakona, s obzirom da ne ispunjavaju uslove o visini ukupnog prihoda svih učesnika u koncentraciji ostvarenog na svjetskom tržištu, koji treba da iznosi 100.000.000,00 KM, kao ni uslove o visini pojedinačnog prihoda svakog učesnika u koncentraciji ostvarenog na tržištu Bosne i Hercegovine, koji treba da iznosi najmanje 8.000.000,00 KM.

Tabela br.2

<b>Procjena tržišnih udjela učesnika u koncentraciji i njihovih glavnih konkurenata na tržištu pružanja usluga tehničkog pregleda motornih vozila na području Federacije BiH u 2019. godini</b>					
<b>Red. br.</b>	<b>Privredni subjekt</b>	<b>Broj obavljenih tehničkih pregleda</b>	<b>Tržišni udio prema broju pregleda (%)</b>	<b>Broj stanica tehničkog pregleda</b>	<b>Tržišni udio prema broju STP (%)</b>
1.	ASA ASSISTANCE	(..)**	(..)**	(..)**	(..)**
2.	REMIS	(..)**	(..)**	(..)**	(..)**
3.	OSING	(..)**	(..)**	(..)**	(..)**
4.	AUTOCENTAR	(..)**	(..)**	(..)**	(..)**
5.	TESTING CENTAR	(..)**	(..)**	(..)**	(..)**
6.	AGRAM	(..)**	(..)**	(..)**	(..)**
7.	CROTEHNA	(..)**	(..)**	(..)**	(..)**
8.	OSTALI	(..)**	(..)**	(..)**	(..)**
<b>UKUPNO 1+5:</b>		(..)**	(..)**	(..)**	(..)**
<b>UKUPNO:</b>		(..)**	(..)**	(..)**	(..)**

Izvor: podaci iz Prijave

Podaci o tržišnom udjelu učesnika u koncentraciji i njihovih glavnih konkurenata na relevantnom tržištu u godini koja je prethodila koncentraciji, navedeni u Tabeli br.2, predstavljaju podatke koje je Podnosilac prijave sačinio na osnovu podataka Instituta za privredni inženjering d.o.o. Zenica, stručne institucije za nadzor stanica tehničkih pregleda vozila, koja je prema Ugovoru o prenosu javnih ovlaštenja za obavljanje dijela poslova iz nadležnosti Federalnog ministarstva prometa i komunikacija ovlaštena za obavljanje dijela poslova iz nadležnosti ovog ministarstva koji se odnose na rad stanica tehničkog pregleda vozila.

Prema podacima prikazanim u Tabeli br.2 zajednički tržišni udio učesnika koncentracije na relevantnom tržištu u 2019. godini iznosio je (..)\*\*, izračunato prema broju obavljenih tehničkih pregleda, odnosno (..)\*\*, izračunato prema broju stanica tehničkog pregleda (STP), što pokazuje da učesnici koncentracije ne ispunjavaju ni drugi uslov za obaveznu prijavu namjeravane koncentracije propisan članom 14. stav (1) pod b) Zakona, prema kojem bi zajednički tržišni udio učesnika u koncentraciji na relevantnom tržištu trebao biti veći od 40%.

Na osnovu naprijed navedenog, utvrđeno je da podnosilac Prijave nije bio obavezan podnijeti prijavu koncentracije u smislu člana 14. stav (1) Zakona, te je odlučeno kao u dispozitivu.

## **6. Administrativna taksa**

Podnosilac Prijave na ovaj Zaključak, u skladu sa članom 2. Tarifni broj 108. tačka c) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", br. 30/06, 18/11 i 75/18) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

## **7. Pouka o pravnom lijeku**

Protiv ovog Zaključka nije dozvoljena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Zaključka.

**Predsjednik**

**dr. Stjepo Pranjić**